

欽定四庫全書

子部
普濟方卷十九



南京中医药大学图书馆版权所有


詳校官太醫院吏目臣周世泰

編修臣倉聖脈覆勛

欽定四庫全書

晉濟方卷九

運氣圖



明

周王朱橚撰

卷之八



少陽相火司天厥陰風木在泉中見太宮土運歲土太
過氣化運行先天火化為天氣清化為左間齡化為司
氣故天氣正而其政嚴酸化為地氣灼化為居氣藏化
為右間故地氣擾而其令撓風迺暴舉木偃沙飛炎火迺
流陰行陽化雨迺時應火木同德上應熒惑歲星其穀
丹蒼故風熱參布雲物沸騰太陰橫流寒迺時至涼雨
並起雨化五風化八正化度也羽蟲靜毛蟲育歲物之宜也裸
蟲耗清毒不生地氣制之也民感其氣者其病寒中外

發瘡瘍內為泄滿聖人遇之和而不爭往復之作民病
寒熱瘧泄聾瞑嘔吐上沸腫色變是歲陽為天氣陰為地
氣中見土運木生火火生土下生上天氣盈宜於年前
先取化源以平天氣之火抑其運土贊所不勝暴過不
生苛疾不起歲宜辛宜酸滲之泄之漬之發之運異風
熱少運寒化其化上鹹寒中酸和下辛涼藥食宜也歲
半之前少陽主之火淫所勝則溫氣流行金政不平民
病頭痛發熱惡寒而瘧熱上皮膚痛色變黃赤傳而為

水身面胗腫腹滿仰息泄注赤白瘡瘍欬唾血煩心胸
中熱甚則飢飢病本于肺診在手天府之脈法宜平以
鹹冷佐以苦甘以酸收之以苦發之以酸復之歲半之後
厥陰主之木能勝土地氣制運風淫于內地氣不明平
野昧草迺早秀民病灑灑振寒善呻數欠心痛支滿兩
脇裏急飲食不下膈咽不通食則嘔腹脹善噫得後與
氣快然如衰身體皆重宜治以辛以甘緩之以辛散之
歲運之化主太過紀曰敦阜是謂廣化厚德清靜順長

以盈至陰內實物化充成煙埃朦鬱見於厚土大雨時行
濕氣迺用燥正迺辟其化圓其氣豐其政靜其令周備
其動濡積并穡其德柔潤重淖其變震驚飄驟其化兼
其所勝其病腹滿四肢不舉故曰歲土太過雨濕流行
腎水受邪民病腹痛清厥意不樂體重煩冤甚則肌肉
萎足痿不收行善痠脚下痛飲發中滿食減四肢不舉
變生得位風雨大至其病腹滿溏泄腸鳴反下其診在
足太谿之脉其法治以醎和初之氣自癸未年大寒寅

初至是歲春分日子初凡六十日八十七刻半主位太
角木客氣少陰火中見土運木生火地氣遷風勝廼搖
寒廼大溫草木早榮寒來不殺溫病乃起其病氣怫於上
血溢目赤欬逆頭痛血崩脇滿膚腠中瘡宜治少陰之
客以醎補之以甘瀉之以酸收之歲穀宜丹間穀宜豆
二之氣自春分日子正至小滿日戌正凡六十日有奇主
位少徵火客氣太陰土中見土運氣與運同火反鬱白
埃四起雲趨雨府風不勝濕雨廼零民廼康其病熱鬱

於上欬逆嘔吐瘡發於中胸噎不利頭痛身熱昏憤膿
瘡宜治太陰之客以甘補之以苦瀉之以甘緩之歲穀
宜蒼間穀宜麻是氣也用涼遠涼無犯司氣之涼三之氣
自小滿日亥初至大暑日酉初凡六十日有奇主位少
徵火客氣少陽火中見土運火當其位天政布炎暑至
少陽臨上雨迺涯民病熱中聾瞶血溢膿瘡欬嘔衄血
渴嚏欠喉痺目赤善暴死宜治少陽之客以酸補之以
甘瀉之以酸熯之歲穀宜丹間穀宜豆四之氣自大暑

日酉正至秋分日未正凡六十日有奇主位太宮土客
氣陽明金中見土運歲土得位與金相生涼迺至炎暑間
化白露降民氣和平其病滿身重宜治陽明之客以酸
補之以辛瀉之以苦泄之歲穀宜蒼間穀宜黍五之氣
自秋分日申初至小雪日午初凡六十日有奇主位少
商金客氣太陽水中見土運金生水陽迺去寒迺來雨
迺降氣門迺閉剛木早凋民病寒邪君子周密是歲土運
制之寒邪迺微宜治太陽之客以苦補之以鹹瀉之以

苦堅之以辛潤之歲穀宜蒼間穀宜稷終之氣自
小雪日午正至大寒日辰正凡六十日有奇主位
太羽水客氣厥陰木地氣正風迺至萬物反生霽
霧以行其病關閉不禁心痛陽氣不藏而欬宜治
厥陰之客以辛補之以鹹潤之以酸瀉之以甘緩
之歲穀宜丹間穀宜稷六氣之治此其道也若乃
歲氣之交有勝氣者必有復氣天氣火勝者當有
太陽之復氣地氣風勝者當有陽明之復氣各依

其復法治之

乙酉歲圖



陽明燥金司天少陰君火在泉中見少商金運歲金不
及氣化運行後天少商之金不及而同天化是謂天符
又金運臨酉是謂歲會上與天符下與歲會三合為治
名曰太乙天符氣至平也平金之歲紀曰審平收而不
爭殺而無犯五化宣明其氣潔其性剛其用散落其化
堅歛其政勁肅其候清切其令燥其類金其應秋其穀
稻其果桃其實殼其蟲介其畜雞其色白其味辛其音
商其數九其物外具在人也其藏肺其主鼻其養皮毛

其病欬此運化也天地之氣為燥化左間為藏化右間
為明化故天氣急而其政切地氣為苦化左間為柔化
右間為動化故地氣明而其令暴陽專其令炎暑盛行
物燥以堅淳風迺治風燥橫運流於氣交多陽少陰雲
趨雨府濕化迺敷燥極而澤蟄蟲迺見流水不冰金火
合德上應太白熒惑其穀白丹間穀命太商者其耗白甲
品羽故曰熱化氣化勝復同邪氣化度也燥化四清化
四熱化二正化度也歲物之宜則介蟲靜羽蟲育地氣

所制也則介蟲耗寒毒不生是以清熱之氣持於氣交
清先而勁毛蟲迺死熱後而暴介蟲迺殃其發燥民病
欬噎塞寒熱發暴振慄癰悶歲半之前陽明主之其化
燥者天之政也歲半之後少陰主之其令熱者地之化
也金為天氣火為地氣火能勝金遇太乙天符命象自
平不資化源惟安其運金無使受邪食白丹之穀以安
其氣食間氣之穀以去其邪歲宜以鹹以苦以辛汗之
清之散之其運同清宜多地化其化上苦小溫中苦和